

COMISIÓN INFORMATIVA DE COOPERACIÓN, INFRAESTRUTURAS E MEDIO RURAL

ACTA da mencionada comisión informativa, correspondente ao día **21 de abril de 2025**

Ás 17.46 horas do día 21 de abril de 2025, reúnese a Comisión Informativa de Cooperación, Infraestruturas e Medio Rural, en sesión ordinaria, na sala de xuntas da Deputación Provincial, coa asistencia dos seguintes deputados e deputadas:

Presidente: D. Luís Menor Pérez

Deputados/as do Grupo Popular:

D.^a Marta Nóvoa Iglesias

D. José María Lago Cabo

D.^a Patricia Torres Madureira

D.^a M.^a del Carmen González Quintela

D. Manuel Seoane Rodríguez

Deputados/as do Grupo Socialista:

D. Álvaro Vila Araújo

D. Emilio Luís Díaz Vidal

D. Aurentino Alonso Araújo

D.^a Susana Rodríguez Estévez

Deputados/as do BNG:

D.^a María José Mangana Guede

D. Bernardo Varela López

Deputados de Democracia Ourensana:

D. Antonio Fernández Martín

D. Gonzalo Pérez Jácome

Secretario: D. Juan Marquina Fuentes Fuentes

Interventora: D.^a Begoña Álvarez Matos

O deputado de Democracia Ourensana, don Gonzalo Pérez Jácome, auséntase no punto 2º da orde do día.

Seguidamente, iniciouse o tratamento dos asuntos incluídos na orde do día, do xeito que se reflicte a continuación:

1º.- APROBACIÓN DA ACTA DA SESIÓN ANTERIOR, CORRESPONDENTE Á DO DÍA

19 DE MARZO DE 2025.-

A Secretaría Xeral deu traslado do borrador da acta da sesión anterior, correspondente á ordinaria do día 19 de marzo de 2025.

Non se producen intervencións e, por unanimidade, a comisión adopta o seguinte acordo:
Aprobar a acta da sesión ordinaria da Comisión Informativa de Cooperación, Infraestruturas e Medio Rural do día 19 de marzo de 2025, conforme co borrador elaborado pola Secretaría Xeral.

2º.- RATIFICACIÓN DO CONVENIO DE COLABORACIÓN ENTRE A XUNTA DE GALICIA, A FEDERACIÓN GALEGA DE MUNICIPIOS E PROVINCIAS E AS DEPUTACIÓNS PROVINCIAIS DA CORUÑA, LUGO, OURENSE E PONTEVEDRA EN MATERIA DE EMERXENCIAS E PREVENCIÓN E DEFENSA CONTRA INCENDIOS FORESTAIS, PARA O DESENVOLVEMENTO DOS GRUPOS DE EMERXENCIA SUPRAMUNICIPAIS (GES) PARA O PERÍODO 2025-2027.-

D.ª Luis Menor Pérez, do Grupo Popular, expón o contido da proposta e das novidades que presenta o convenio para o período de 2025-2027.

D. Bernardo Varela López, do BNG, sinala que o seu grupo vai apoiar esta iniciativa xa que se trata dun acordo a nivel galego entre a Xunta e as catro deputacións.

Don Aurentino Alonso Araújo, do Grupo Socialista, indica que non estaría de máis que desde a Xunta de Galicia se asesorase aos concellos en materia de normativa sobre estes grupos de emerxencia en particular no relativo á prevención de riscos, seguridade e saúde, equipamentos ou materiais.

Non se producen máis intervencións e co voto favorable do Grupo Popular (6), do Grupo Socialista (4) e do BNG (2), e a abstención de Democracia Ourensana (1), a comisión ditamina favorablemente a adopción, por parte da Xunta de Goberno, do seguinte acordo:

1º.- Ratificar a subscrición do convenio de colaboración asinado entre a Xunta de Galicia, a Federación Galega de Municipios e Provincias e as deputacións provinciais da Coruña, Lugo, Ourense e Pontevedra en materia de emerxencias e prevención e defensa contra incendios forestais, para o desenvolvemento dos Grupos de Emerxencia Supramunicipais (GES) para o período 2025-2027.

2º.- Autorizar expresamente a distribución das anualidades de gasto para os exercicios 2025, 2026 e 2027, correspondentes á Deputación Provincial conforme co establecido no dito convenio.

3º.- Establecer que o libramento dos fondos se realice a favor dos concellos que sexan sede ou subsele dos grupos de emerxencia supramunicipais ou aos servizos municipais, conforme co establecido no dito convenio. A xustificación dos fondos levarase a cabo conforme coas previsións establecidas no dito convenio.

4º.- Designar como representante desta Deputación na comisión mixta de seguimento do convenio ao presidente da Deputación, don Luis Menor Pérez, como titular; ao vicepresidente 3ª e deputado delegado da Área de Administración Provincial, Transparencia, Emerxencias e Cooperación Transfronteiriza, don Plácido Álvarez Dobaño, como primeiro suplente; e ao deputado delegado da Área de Medio Ambiente e Enerxía, don José María Lago Cabo, como segundo suplente.

3º.- MOCIÓN DO GRUPO SOCIALISTA PARA A ADOPCIÓN DUN PLAN DE PREVENCIÓN E CONTROL DA LEXIONELA EN COLABORACIÓN COS CONCELLOS DA PROVINCIA.-

D. Álvaro Vila Araúo, expón o contido da seguinte moción:

Coñecida polo seu patrimonio natural e riqueza termal, a provincia de Ourense está a afrontar un reto significativo no que atinxe á lexionela. Un problema maior de saúde pública provocado por unha bacteria na orixe de enfermidades graves como a denominada “febre dos lexionarios”, conformándose nunha crecente preocupación pola súa presenza en instalacións hídricas. Esta situación non só afecta á integridade física das persoas, senón tamén ás economías locais, ao turismo e mesmo á imaxe que proxecta a provincia. Asegurar unha correcta xestión e prevención da lexionela entóxase unha responsabilidade compartida entre administracións e gobernos, empresas e cidadáns, pero que require dun liderado claro e coordinado de parte das institucións públicas. Neste senso, a Deputación de Ourense ten un papel fundamental para abordar esta problemática a través da promoción de medidas preventivas, fomentando a concienciación e garantindo a coordinación entre actores implicados.

Mantendo unha tendencia preocupante, nos últimos anos rexistráronse varios brotes de lexionela na provincia, en ocasións asociados a instalacións termoilladas ou sistemas de auga mal mantidos. No 2019 rexistráronse 25 casos, dos cales catro foron graves; 28 casos no 2020, con cinco graves; 31 casos no 2021, incluíndo un brote asociado a unha instalación termal que afectou a sete persoas; 33 casos no 2022, sendo o dato máis alto da pasada década; e 18 casos durante o primeiro semestre de 2023. A media estatal sitúase nos 1,5 casos/100.000 habitantes, sendo Ourense a provincia galega cun meirande número

de casos de lexiionela con 2,8 casos/100.000 habitantes en 2022, seguida de Pontevedra con 2,1 casos/100.000 habitantes, presentando A Coruña e Lugo cifras moi inferiores. A febre dos lexiionarios pode ter consecuencias graves, oscilando a taxa de mortalidade asociada entre o 6-8%, especialmente entre persoas maiores de 65 anos ou con patoloxías previas e inmunodeficiencias.

A presenza de instalacións obsoletas, mal mantidas e sen adecuada revisión incrementa o risco de proliferación da bacteria. Os edificios de titularidade municipal que poden verse afectados pola proliferación da lexiionela figuran aqueles que teñen sistemas de auga quente sanitaria, torres de refrixeración ou instalacións obsoletas. Entre estes, cabe subliñar pavillóns con vestiarios e duchas comúns, centros socio-comunitarios e residencias, sendo aquí unha agravante a idade avanzada e vulnerabilidade do groso dos seus usuarios; edificios administrativos e escolares con sistemas de climatización centralizada e auga quente; así como instalacións termoilladas e fontes públicas, que poden acumular biofilme e favorecer a proliferación da bacteria. As circunstancias particulares da nosa provincia e a asunción de cada vez máis competencias impropias fan que os concellos non adoiten dispoñer dos recursos necesarios para realizar controis periódicos e manter unha correcta calidade da auga.

Os custos sanitarios derivados do tratamento destas enfermidades son significativos tanto para o sistema público como para as familias afectadas, sendo a prevención a mellor das estratexias a adoptar fronte á lexiionela. Doutra banda, a existencia de brotes ou casos da febre do lexiionario dana a imaxe da provincia e afecta negativamente ao sector turístico, nomeadamente o turismo termal, que é un dos motores económicos de Ourense. A percepción de inseguridade pode crear un clima de alarma susceptible de desalentar a visita de turistas e a utilización de instalacións públicas. A normativa estatal e autonómica en vigor establece obrigacións claras sobre a prevención e control da lexiionela, pero a súa aplicación non sempre é homoxénea. Un problema con fondas implicacións para o desenvolvemento económico e social, que fai urxente a acción da Deputación, que ten competencias indirectas pero importantes na promoción da saúde pública, no apoio a concellos e na coordinación de políticas territoriais.

*Por todo o exposto o Grupo Provincial Socialista presenta as seguintes **PROPOSTAS DE ACORDO**:*

PRIMEIRA.- Crear un fondo económico específico e establecer liñas de axuda destinadas a facilitar a aplicación efectiva, por parte dos concellos da provincia de Ourense, do Real Decreto 487/2022, de 21 de xuño, polo que se regulan os requisitos sanitarios para a

prevención e control da lexionela no Estado español. Este fondo buscará apoiar a adaptación e modernización das instalacións hídricas municipais, garantindo o cumprimento das normativas e mellorando a seguridade sanitaria das infraestruturas.

SEGUNDA.- Impulsar campañas informativas dirixidas á poboación en xeral e aos responsables de instalacións hídricas na provincia de Ourense, co obxectivo de aumentar a concienciación e sensibilización sobre os riscos asociados á lexionela e as medidas preventivas necesarias. Ademais, organizar cursos de formación específica para técnicos e persoal responsable das instalacións, facilitando os coñecementos e ferramentas precisas para unha correcta xestión e mantemento das mesmas, co fin de minimizar os riscos sanitarios asociados.

D. Bernardo Varela López, do BNG, intervén para manifestar que este exceso de regulamentación que estamos a padecer nos derradeiros anos complica moito a xestión destes espazos e duplica os gastos.

D^a. Ana Patricia Torres Madureira, do Grupo Popular, intervén para manifestar a reserva de voto do seu grupo de cara ao Pleno.

Non se producen máis intervencións e co voto favorable do Grupo Socialista (4) e a abstención do Grupo Popular (6), do BNG (2) e de Democracia Ourense (1), a comisión ditamina favorablemente a adopción, por parte do Pleno, do seguinte acordo:

PRIMEIRA.- Crear un fondo económico específico e establecer liñas de axuda destinadas a facilitar a aplicación efectiva, por parte dos concellos da provincia de Ourense, do Real Decreto 487/2022, de 21 de xuño, polo que se regulan os requisitos sanitarios para a prevención e control da lexionela no Estado español. Este fondo buscará apoiar a adaptación e modernización das instalacións hídricas municipais, garantindo o cumprimento das normativas e mellorando a seguridade sanitaria das infraestruturas.

SEGUNDA.- Impulsar campañas informativas dirixidas á poboación en xeral e aos responsables de instalacións hídricas na provincia de Ourense, co obxectivo de aumentar a concienciación e sensibilización sobre os riscos asociados á lexionela e as medidas preventivas necesarias. Ademais, organizar cursos de formación específica para técnicos e persoal responsable das instalacións, facilitando os coñecementos e ferramentas precisas para unha correcta xestión e mantemento das mesmas, co fin de minimizar os riscos sanitarios asociados.

4º.- MOCIÓNS DE URXENCIA.- Non se presentan.

5º.- ROGOS E PREGUNTAS.-

Nesta quenda prodúcese as seguintes intervencións:

D. Bernardo Varela López, do BNG, formula o rogo de que os técnicos provinciais revisen a execución da obra realizada na estrada provincial OU-0102 en Xunqueira de Ambía, xa que se ben está asfaltada, se empregou rego bicapa con bastante grava miúda e non se instalaron nin biondas laterais nin sinalización que advirta do perigo se se circula a demasiada velocidade. Ademais engade que debe corrixirse o acceso do viario que vai ás piscinas e ao cemiterio, xa que a día de hoxe é moi difícil acceder.

A Presidencia toma nota do rogo formulado.

E, ás 18.05 horas, dáse por finalizada a reunión, redactándose a presente acta que se asinará electronicamente. Dou fe.